

Yakobo

Yaizéze ac.

¹ Anutu zéma Miñ Kewunina Yesu Kristo iorac welen qeçe icgira ni Yakobonéñ Israelac hicñisai kisic 12 igucnec hahaya baec séc tuima kecanzu onac yaizéze ac énézéza.

Ninzéñ ninzéñ zéma nintegic qindegic.

² (2a) Dacmuna hécna,

³ ini imi ninzéñ ninzéñginawac manam batucnéñ nanañ seli mihicñi énécmianzac imi ninzu imuac niñac ^(2b) ini manam batuc hénia hénia hicñi énécmiyu séc imuac me imuac ninçic ségiségiyaguc wandacmac.

⁴ Waigic imuac me imuac bisiqatén kekecnéñ wañgéñu solañanima ic waziwaziya wamma imuac me imuac ménda hocbésémañ.

⁵ Onarunec méñac méñ nindegic qindegicnéñ séha ménda hemizaciguc, Anutu qesimiyu midacmac. Inéñ qesimimu séc ménda zéqetali énécmima sécgina ogicma énécmianzac.

⁶ (6a) Ic méréñéñ ewa éréhéc wañanzac imi konduñ temboña luhucnéñ qema mihilañgéyu yacma salalañgéanzac tanec wanzac.

⁷ Imuac mia ic imuhyanéñ Miñ Kewuninawac murunec iwawai méñ memañ imuhuc ménda zéma nimmac.

⁸ Ic imuhuya imi hénia imuac me imuac kemmac séc ewa éréhéc, qeka meka wañanzac.

(6b) Imuac niñ ewa éréhéc komocdia dac ménj ménda wamma ninzénjéma zéwelecmimac.

Iwawai hemimia zéma ménda hemimia.

⁹ Ninzénj ninzénj ic ménj maqeqeya keczaciguc Kristoac qeriaiguc meyac mimiawac keczac imuac zézé ségiséji wammac.

¹⁰ Wañu dacmuna méjnénj hofi hinacyaguc kecanczaciguc zariñ éséc bura tima qahac wammac imuac niñac kekec mamayawac niñac Anutu nimmima zéhiaru mimac.

¹¹ Kaiwe geric bélañagucnénj éréma qézézac qeyu sélécgéma zuria imi mayu imuac kiwiya hiabia imi birima qahac wañanzac. Ic hinac yanda ginaguc imi acguc aigina mema kenkenja imuac suraiguc imuhucyanec sélécgéma qahac wandacmu.

Manam batuc zéma séwiac siñ.

¹² Ic ménj manam batuciguc nañselima kecanczac imi mériañaguc wanzac. Meseliyu Miñ Kewunénj niñu sécgéyuguc kekecac opoc edamuyaguc Miñ Kewunénj héñsoroc wañ énécmianzac ionac énécmimañ zé ac zikima zéyec imi énécmiyu késamu.

¹³ Wañu ic méjnénj manam batuc hicñimiyu Anutunénj batucgénénzac imuhuc ménda zémac. Anutu imi birianénj batucgé mimacac séc qahac. Wañu eñeyaoc imi ic ménjac ménj ménda batucgé mianzac.

¹⁴ Wañu ic ménjac ménj manam batuc hicñimianzac imi mia eñeya siñ birianénj hérémima kemma qatémianzac.

¹⁵ Wañu siñ iminéñ tackecma héri haima kápésic mihicñianzac. Wañu kápésic iminéñ yandima héri haima humuc mihicñianzac.

¹⁶ Dacmuna soroc hécna, galeñ megic ikoc wañ énécmiwac niñac.

¹⁷ Ewa hiawac buña hiabia méñnéñ méñ zéma sese solañ méñnéñ méñ imi moczoñ ounec Mañgoc asac mararañaguc iwac murunec mama haanzac. Iwac muru imi ménzé ménzé haka me ireha melenqeleña méñ ménda hezac.

¹⁸ Iwawai inéñ zéyu hicñima keczu imuac sugcinaiguc neñañ imi héla gocmia walac walac wambin niñac eñeya ewa siñ méndacma ackuazéc hélanéñ héri haima mihicñi nénécmiyec.

Gezacnéñ ninija zéma niñ tohotohoya.

¹⁹ Dacmuna soroc hécna, ini yomuhuc nimmu. Ic méñnéñ méñ focdac gezac haima nimmac, néñ ac bakia imi focdac ménda melemmac. Wañu niñu biriyu qeria focdac ménda yacmac.

²⁰ Qeri biricnéñ kekec solañ dindiña Anutunéñ niñu sécgéanzac imi ménda mihicñimac.

²¹ Imuac bec, ninij qakola zéma kaijiliwen haka imi moczoñ hetecgé gilidacma, qeri unagina aṅgéñ tiénécmiawac kuha, qeri ginaiguc bec himic énécmiyu hezac ackuazéc imi goiya héima aṅgéñ tima héwiña héimu.

²² Ini ackuazéc imi eñdac gezacginanéñ sac nimma ikoc ménda wañamumu, néñ niñtohoma moczoñ wandacmu.

²³ Ic méñnéñ méñ ackuazéc imi gezacnéñ sac nimma ménda wamma memac imi ic méñnéñ

eneya séwíac kic ségéraya wikiñiguc añanzac ésécnec wanzac.

²⁴ Eneya añañu tecgéyu kenkecma kic tanera dimuhucya imi focdac eluñ qeanzac.

²⁵ Néñ ic ménñ héna ac solaña kápésic igucnec hulac énécmianzac imi hémma héngésima ménda eluñ qeyu wammanec kecmac imi wawañ memeya séc héla mériañ mihicñimac.

²⁶ Méñnéñ ménñ eneya niñac niñu Anutu ee héihéi wammimia tanec wañuguc kilenñ eze-laña galeñ ménda mema eneya ewa qeriya ikoc wañamumaciguc imi iwac ee héihéi wañmimiawac haka iminéñ enomia wammac.

²⁷ Anutu Mañgocnéñ niñu buña suruc hiabia imuac ai lalaclalac solañ qeqeya wañanzac imi mia embac maléya zéma merac gupaña inicgaleñ wañ énécmima baecac wawañ meme biria igucnec gésiamuma gocya qahac keckec imi mia.

2

Haka bakésasacnec ménda wammu.

¹ Dacmuna hécna, Miñ Kewunina Yesu Kristo edamuyaguc i ninzén géanzuiguc imi ic ménñac ménñ bakésasaciguc ménda énépésimu.

² Onac tocgotocgo amaiguc ic ménñ méria merawaiguc binenñ golinén memeya haiyu hiñgaru owo maleku héñsoroc sorocgia hima éréyu duña ic maqeqeya ménñ owo malekuya qakolayaguc hama érémaciguc

³ ini ic owo maleku héñsoroc sorocgia hima érezac iwac muru liliñgé hémma you hama tatac hiabia yomuaru tacna zéma ic maqeqeya iwac

niñac zéma gi hia imuaru nanna me hénanaiguc mama tacna zémuiguc imi

⁴ ini niñgic, eñañ eñaocnec héngési wañamuma niniñ birianéñ niñgésima gésigési icya séciguc kecanzu tanec ménda wanzac me?

⁵ Dacmuna soroc hécna zéwa niñgic, Anutunéñ baec yomuaru ic maqeqeya gésima énépésima ninzéñ ninzénгина meyandi énécmima i siñ nimanianzu ionac mia iwac héngalen ama areña yanda ara zikima buña qeénécmiyec imi mératéc énécmiyu késagic.

⁶ Néñ ini imi néwécgeña ic maqeqeya mema titi wañ énécmianzu. Wañu méré méré eneñ yéwéri mihicñi énécmima aciguc onopocanzu me? Imi mia ic hinac soukiwaginaguc.

⁷ Wañu onac unuruma Kristoac tohotoho ichéra zéanzu qacgina eebipiyaguc imi ic soukiwaginaguc ieneñ zébiri qébiri ménda wañanzu me?

⁸ Ini imi kiwi téréyaiguc hezac séc gi geña niñac goi héihéi wañamuanzan ésec alagawac imuhuyanec wammiwésémañ zéyec héna ac eñeña imi niñtoho wañanzuiguc imi hia wanzu,

⁹ néñ ini goi héihéi imi bakésasaciguc soukiwa ic ionacnec wañ énécmianzuiguc imi késpedesic wañkeczu. Imuhuc wañgic héna acnéñ késpedesic ic zéma zétecgé énécmimac.

¹⁰ Méñnéñ méñ héna ac moczon niñtoho wamma kecma momacguc ménda tohoma qonzonton gémac imi, héna ac moczon yanda logizac wanzac.

¹¹ Imi mia kaisero ménda wambésémañ zéyec inéñnec mia icac kekec humuiguc ménda

opocbésémanj zéyec. Imuac bec kaisero ménda wamma icac kekec ménj humuciguc opoczanjiguc gi bec héna ac imi logizanj wanzac.

¹² Ini imi nalé ménda sosoliyu hulac énécmimac niñac énécmiyec héna ac qelia imuaru namma gési énécmimacac hezac. Imuac héna ac qelia imuac séciguc namma acgina zéma hakagina wammu.

¹³ Wésé nininj qahac hakagina wanjanzu ionac imi wésé nininj qahac zégési énécmimac. Wésé nininj iminéj zégésigési imi ogicma eneja wanzac.

Ninzéj ninzéj wawanj memeya qahac imi humumia.

¹⁴ Dacmuna hécna ic ménénj ni ninzéj ninzéjnaguc keczua zémaguc wawanj memeya qahac kecmaciguc imi iwac muru némac hiabia ménj hicñimimac? Ninzéj ninzéj imuhuyanénj eneya hia mehiaru mimacac séc wanzac me?

¹⁵ Ic me embac dacmunagina ménénj séwi usuya zéma nene iwawaiya qahac kecanzaciguc

¹⁶ Onarunec ménénj kuanec sac ézéma ala, bénzérnec hama kenna; Kemma geric zonimma nene nena sécgé géju. Imuhuc ézéma séwiac iwawai ménj ménda mimaciguc, ac iminéj némaciguc méra mimac?

¹⁷ Tanec imuhuyanec, wawanj memeyanéj ménda hemiyu ninzéj ninzéj eneya imi humumia wanzac.

¹⁸ Wanj ménj yomuhuc hia zémacac séc; Gi ninzéj ninzéjnaguc, wanj ni wawanj memenaguc, imuac ninzéj ninzéjga wawanj memeya

qahac imi nézéna hémma ni wawan memenaiguc ninzén ninzénna gézéwa hénna.

19 Gi Anutu momacguc keczac imi ninzénngéanzañ. Imi hia wanzañ. Uña biria acguc iwac ninzénngéma zénéngina hiriyu kecanzu.

20 Oh, ic watalaña gi, ninzén ninzén wawan memeya qahac imi gorosonja wanzac imi niñasarimanñ zé wañgénzac me?

21 Neñañ esañ ambécnina Abarahamnén naña Isaka zaki téréya qahaiguc haimiyec. Nalé imuaru Anutunén ic solaña zémiyec. Gi ninna imi wawan memeya niñac qahac tanec wanzac me?

22 Oloñ ninzañ ésécnec ninzén ninzén iminén iwac wawan memeyaguc momacnec aiya meyc wawan memeya néñnec ninzén ninzénna imi solañaniyec.

23 Imuac kiwi téréya ménjiguc yomuhuc zézac imi hélaguc wañec, Abarahamnén Anutu ninzénngé miyu haka imuac mia niñu solaña wañec. Wañu ic imi Anutuac alaya zémimia wañec.

24 Imi hénni, ic ménñén ninzén ninzénanec qahac, néñ wawan memeyaguc niñac wamma ic solaña zémimia wanzac.

25 Wañu imuhucyanec héna yanda embac Rahap imi kicgaleñ ic méli énécmigic* kenjic imi unuruma héna ménjunec méli énécmiyu kenjic wawan meme imuac mia solaña zémiyec.

26 Séwi qeri uñaya qahac hezac imi séwi humumia, imuhucyanec ninzén ninzén wawan memeya qahac imi humumia.

* 2:25: Girik aciguc; kua meme ic.

3

Ezelaṅgina galeṅgému.

¹ Dacmuna hécna, ini kiwi ic wamma kecziṅ neṅaṅ képésicninawac kitiwa réwéria mihicṅwiṅac hezac imi niṅasarima kiwi ic sécna ménda ogicma wambiṅ.

² Neṅaṅ moczoṅ yanda iwawai sasalaiguc qonzontoṅ géma mama nunuanzac. Imuac ic mén ackuazécyaguc képésira mén ménda hezaciguc ic imi solaṅ dindiṅa. Ic imuhuyanén séwiya moczoṅ yanda pinzuṅa hai amuma dindiṅanec kecmacac séc wanzac.

³ Neṅaṅ becosic eneṅ acnina tohomu niṅac kuaginaiguc pinzuṅ haima séwigina moczoṅ hérékeṅ héréha waṅ énécmianziṅ.

⁴ Waṅu konduniguc zéic héngic. Zéic imi kuney yanda, waṅu luhuc selianén mihilaṅgéyu keṅanzac, néṅ qindi qindiṅiya komocdia dac imi haima nesinesi icyawac ewa siṅ hezac séc nesima keṅha waṅanzac.

⁵ Imuhucyanec ezelaṅ imi séwi ninawac kitiwa komodia mén, waṅu wawaṅ meme kuney yandawac tétéc qeṅe ac zéanzac.

Héngic, geric lokoc komocdia dac ménhéṅ zéléṅ baec yanda zeric qericdacma keṅanzac imi hémma nimmu.

⁶ Ezelaṅnina imi geric lokora, biriayanén séwiya moczoṅ mesécgé mima eṅeya buṅa késayu séwiya imi iwac baec kurumeṅa wandaczac. Séwininawac kitiwa sasala sugcinaiguc inéṅ séwinina moczoṅ yanda mebirima karisi hénia ésécnec lelecgéma kemma hicṅjsaiya hicṅjsaiya

zeric qeric waŋ énécmianzac. Waŋu zeric qericac kuha imi geric siawac bélaŋa igucnec haanzac.

⁷ Yaŋqesi hénia hénia zéma nei zuku hénia hénia zéma zinimokoleŋ hénia hénia zéma konduŋ qeriaiguc iwawai kekec ginaguc hedaczu imi icnéŋ mebélacgé énécmigic ionac niniŋnec méndac énécmianzu, néŋ

⁸ ezelaŋnina imi ic méŋnéŋ méŋ mebélac gémacac séc qahac wanzac. Imi biria ménda sima aiya meanzac. Waŋu iwac muru imi kumiŋ humuc mihicŋi nénécmimianéŋ sécgéma hezac.

⁹ Ezelaŋ iminéŋnec neŋaŋ Miŋ Kewu maŋgocnina mepésimima legicya héima iminéŋnec acguc ic tosara Anutu eŋeya tanera méndacma meénécmimia imi saecgé énécmianziŋ.

¹⁰ Kua imi momacguc, néŋ imuarunec mozoc ac zéma saec ac momacnec maanzac. Dacmuna hécna haka imi nimba ménda sécgézac.

¹¹ Doku kiwa momacgucnéŋ doku saola zéma howuc howura momacnec mihicŋi nénécmimac me?

¹² Dacmuna hécna, ini niŋgic fik icac uranéŋ oliwa gocmia hia haimac? Waŋu waiŋ icac uranéŋ fik gocmia hia haimac? Qahacgucnec!, imuhucyanec doku howec yagucnéŋ doku saula mihicŋi nénécmimacac séc qahac.

Niŋtegic qiŋtegic ou kurumenŋ igucnec hahaya.

¹³ Onarunec mérénéŋ niŋtegic qiŋtegic zéma niniŋa asacasaria keczac? Inéŋ haka hiabia wamma gum bénzénzéŋa niŋtegic qiŋtegicya igucnec hahaya iminéŋnec wawaŋ memeya imi menénécmiyu hémbiŋ.

14 Waŋu onac ewa qeriginaiguc nimbupuc howuc kétéŋkétéŋa zéma féŋgéc hakanéŋ héwiwiŋ gézagicuc ackuazéc héla qema tétéc qeŋe zéma ikoc ménda wammu.

15 Niŋteŋic qinŋteŋic imuhuya imi kurumeŋ igucnec ménda maanzac, néŋ baec igucnec zéma ic séwi siŋ igucnec zéma Biria miŋinawac murunec haanzac.

16 Hénia yomuhuc niŋac mia imuhuc zézua; Nimbupuc zéma hémbaoc hezac imuaru hazéc zéma haka biria hénia hénia hezac.

17 Néŋ niŋteŋic qinŋteŋic kurumeŋ igucnec hahaya imi walac ewa qeri météréya zéma luae, gum bénzénzén, niŋtoho, wéséniniŋ zéma héla gocmia hiabia sasala mihicŋima bakésasac qahac, kiciguc welen qeŋe qahac, imuhucya.

18 Luae qeŋe icnéŋ luae qesama kekec so-laŋawac héla mihicŋianzac.

4

Baecac ala siŋ.

1 Sucginaiguc euŋac zéma tualefic imi dimuacnec haanzac? Imi mia séwi taséhécgina sucginaiguc tosara euŋac wawaŋawac siŋginaguc keczu ionac murunec haanzac.

2 Ewa siŋ kuneŋ yanda waŋénéc mianzac, néŋ ménda mihicŋizu. Unu humu waŋamuma nimbupuc waŋanzu, néŋ hia mihicŋimuac séc qahac waŋzac. Imuac mia ini euma hazéc ac waŋamuzu. Waŋu hénia héla imi zéwelecgina qahac kecanzu imuac niŋac ménda mihicŋi keczu.

³ Waṅu zéwelecmima kileṅ ménda mihiçñizuiguc imi eṅaṅ siṅginawac menec qenec wammu niṅac sigima zéwelecgic.

⁴ Kaiseroac ic embacya ini, baecac iwawaiyaguc ala wamma kekec imi Anutuac hazéchéra wamma kekec wanzac imi ménda niṅacgézu? Imuac ic méréneṅ baec ala wammimaṅ zé ewa ewa waṅanzac imi eṅeyaoc Anutuac hazéra wawaṅa wanzac.

⁵ Ini kiwi téréyaiguc Anutunéṅ Uṅa Téréya méli nénécmiyu ewa qerininaiguc kecanzac Uṅa Téréya iminéṅ mia nimbupuc wammacac séc waṅ énécmianzac zéyec,* néṅ ini imi ac imuac niṅic eṅomia wanzac me?

⁶ Waṅu imi sac qahac, néṅ inéṅ ewa hi-awac buṅa kuneṅ yanda nénécmianzac. Imuac yomuhuc zéyec; Anutunéṅ tétéc qeṅe ic nesi énécmiyu keṅic ewa qerigina memaamuma keczu ionac mia ewa hia waṅ énécmianzac.

⁷ Imuac ini Anutu niṅtoho wammimu. Imuhuc wamma Biria miṅina hazéc wammimu. Imuhuc wammigic qiziziqé énécmimac.

⁸ Anutu hosucgémgic, imuhuc waṅic i acguc hosucgé énécmimac. Biria meme ic ini méragina zuacgic lalacalac wammac. Ewa qerigina keṅhéi hahéi waṅanzac ini ewa qerigina métérégic lalacalac wammac.

⁹ Qerinéṅ yaï wisisiṅaguc zésiác wamma ewa biric wammu. Zédesigina melenṅic zésiáciguc, zézé ségiségigina melenṅic niṅ yéwériiguc kem-

* **4:5:** Tosara imi yomuhuc melemma ogic hezac; Anutunéṅ qerininaiguc uṅanina hai nénécmiyu hezac imuac héṅgaleṅ wammianzac.

mac.

¹⁰ Miñ Kewuac kiwaiguc memaamumu, inéñ meen énécmimac.

Ic tosara ménda niñgési énécmimu.

¹¹ Dacmuna hécna, zébiri qébiri ménda wanamumu. Mérénéñ mén dacmunaya zébiri mizac me gésimizac imi héna ac zébirima gésizac wanzac. Héna ac gési keczañiguc gi héna ac tohotoho ic qahac, néñ gésigési ic keczañ.

¹² Héna ac miñina zéma gésigési ic imi momacguc sac keczac. Inéñ mia bénzén añgén tiénécmimac me bénzén mebiri énécmimacac séc. Néñ gi méré icnéñ alahécgina gési énécmianzañ.

Orañgucac niñkumuma tétéc qeqe wammuc ménda hezac.

¹³ Zéwa niñgic, sugina igucnec tosara erac me orañ nini tañ imuaru me imuaru kemma soukiwa ai mema kosia mema kecni yawuñ mén tecgéyu hawiñ. Imuhuc zéanžu ini ac yomi nimbésémañ;

¹⁴ Orañguc némacnéñ hicñi énécmimac imi ini ménda niñzu. Kekecgina imi némac iwawai? Ini imi baec wéséséya nalé hotoña dac kecma aocgéanzac imuhucya.

¹⁵ Imuac ini néwécgeña yomuhuc zémuac hezac, Miñ Kewuninanéñ niñu sécgéyu nini kecma ai imi mewiñ.

¹⁶ Ini deguc tétéc qeqe ac enomia wamma séwi enéñ wanžu. Wanžu tétéc qeqe ac imuhucya imi moczoñ biria wanzac.

¹⁷ Imuac mia ic mérénéj wawanj meme hiabia wawanawac séc ninjegic qinjegicya hemiyuguc kilenj ménda wanu késpedesya wanzac.

5

Ic soukiwaginaguc ionac goro ac.

¹ Hinac zéma soukiwa yandaguc keczu ini gezac haima ninjic. Zéra waiya hicji énécmimacac hezac imuac nimma qac siac wammu.

² Hinac mérianjina imi houdaru owo malekugina imi qakolanéj qedaczac.

³ Goli siliwaginanéj hufenaguc wandaczac. Wanu hufenja iminéj geric ésécnec séwi busugina nema héniajina zéaumac. Ini imi nalé teteçgiaiguc hinacgina qauqau haigic enzac.

⁴ Ninzu, ai ic tosara onac aiginaiguc héla tocgogic imuac ai boñajina anjétima ménda énécmigic ai boña iminéj qaczac. Wanu toçgotogco ai megic ienenj siacgic Miñ Kewunina, Miñ Kewu Pupunda iwac gezawaiguc hinjaczac.

⁵ Ini baeciguc hémbaoc wamma iwawai hiabianéj mezeric amuma kecma unu hézénj hézénjgiawac naléyaiguc ewa qerigina halécya dépañ yanda wanu keczu.

⁶ Wanu ini ic solaña imuac mia késpedesyaguc zéma zéteçgéma qehumugic. Wanu inénj musuqeçe ac ménj ménda melenj énécmiyec.

Qenzenj manzenjiguc nanjselimu.

⁷ Imuac dacmuna hécna, ini nalé horugiyu nanjselimanec kecgic Miñ Kewunina harémac. Himicnec qimicnecac icyanéj héla gocmia baec igucnec hicñianzac imuac mambéc kecma

niñselima kia naléya zéma kaiwe naléyawac*
mambéc kecanzu.

⁸ Ini acguc ewa qerigina niñseligima nalé horua
nañselima kecmu. Miñ Kewuninawac hahayawac
nalé imi ducñizac.

⁹ Eñacnec diric doroc ac ménda wañamumu,
ac imi tohoma kecgic gésigési ac zéranéñ qizizingé
énécmima kemmac. Niñzu gésigési icnéñ hosucgé
énécmima naguiguc sénganğen nanzu.

¹⁰ Dacmuna hécna, kua meme ic Miñ Kewun-
inawac qaraiguc zégic i inicgic zérabéra zéma
mambéc kekec horua imuac sésécgina wammu.

¹¹ Niñzu nañselima kecanzu ionac nimma
mériañ ginaguc zéanziñ. Ini Yop ac nanañ
seli imi gezac ginanéñ niñgic. Wañu Miñ
Kewuninanéñ tetecgiaiguc dimuhuc wammiyec
imi oloñnindaczu. Miñ Kewunina imi méñac méñ
ogicma ewa biric zéma wésé niniñ kuneñ yanda
wañ nénécmianzac.

¹² Dacmuna hécna, ac méñ méndagucnec
zéselimu. Ac imuac niñgic ac tosara onogicma
réwéria wammac. Kurumeñac qaraiguc me bae-
cac qaraiguc iwawai tosara méñac qaraiguc ko-
roma ménda zéselimu. Niñgic oaec wañu oaec
zému, wañu qahac wañu qahac zému. Imuhuc
ménda wañgic, késpedes ginaguc zéénécmiwac
niñac.

Niñzégéma zéwelecmu.

¹³ Onarunec méñnéñ yéwéri mihicñizaciguc
imi Anutu zéwelec wammimac. Méñnéñ méñ

* **5:7:** Girik aciguc; Kia walaha zéma kia tetecgia.

ségiséigiuc keczaciguc imi mepé qepésiac legic héimimac.

¹⁴ Onac murunec ménj hafi zepayaguc keczaciguc imi hénarinj ionac qeriac galenj unuruyu hama Miñ Kewuninawac qaraiguc halécnénj naec mima zéwelecmu.

¹⁵ Zéwelecgina ninzénj ninzénjinaiguc wawaña imi hafi ic mehiaru énécmimac. Miñ Kewuninanénj hafiya igucnec meyacmimac. Wañu késpedesic ménj wañeciguc imi acguc waimimac.

¹⁶ Imuac bec késpedesicgina zézuac wañamuma hafigina hiarumac niñac nañgé amuma zéwelec wammu. Ic solañanénj zéweleru kuhaguc zéma hélaguc wañanzac.

¹⁷ Elia imi hénia ya ic omaya neñañj ésécnec, nénj inénj kia ménda hamac niñac solañanec weleru yawuñ haréwéc zéma maso 6 imuac séc baeciguc kia ménda mayec.

¹⁸ Wañu muñguc weleru kurumenjnéñj kia haiyu mayu baecnénj héla mihicñiyec.

¹⁹ Dacmuna hécna, onarunec méñnéñj ackuazéc héla waima rouc keru ic méñnéñj nañgémiyu lilingéma hamaciguc imi

²⁰ nañgémiyec inénj lilingéma hayec iwac qeri uña imi humuc igucnec añañña tima késpedesicya sasala osodaczac. Ini hénia imi ninjtecimu.

SISIPAC AC QJELIA
The New Testament and Psalms in the Kube Language
of Papua New Guinea
Buk Song na Nupela Testamen long tokples Kube long
Niugini

copyright © 2012 Global Bible Translators

Language: Mongi (Kube)

Translation by: Global Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-23

PDF generated using Haiola and XeLaTeX on 18 Apr 2025 from source files dated 31 Aug 2023

0403b50f-078d-52e2-a203-056e8a430665